

【學泅水】徐姿華原作

佢一旦就當驚水，小學一年生該下，先生鼓勵大家學泅水，講泅水係當好個運動，身邊個好同學做下學會泅水哩，硬性個佢乜毋願輸人，轉去屋下就緊嚟¹阿媽講愛去學泅水。趕等暑假，阿媽同佢尋著一間溫水個游泳池，還問著名聲盡好個教練來教佢，過買一身靚靚個連身游泳衫分佢，鼓勵佢勇敢學泅水。

第一到去到游泳池，又驚又好。做好軟身運動，教練帶佢同另外四個學生仔練習沒水、學換氣，同佢兜一個一個拗入游泳池。佢兜乖乖聽教練個指示，同頭那沉²入水裡肚，佢嚇到胚命仔扳等游泳池脣、腳趔趔仔毋敢沾著水、抽骸另命、噉到目流鼻涕，像分人苦毒到當衰過樣仔；脣項個人做下緊看佢緊笑，教練緊拐佢，佢還係噉到抽骸、毋肯落水，高不將正喊阿媽同佢帶轉去。

該暗晡，阿爸軟聲勸話佢繼續去學泅水；阿媽就唉唉唧唧道嘆：「你毋去上課，學費就了忒哩，無好退！」阿哥也分享自家學泅水個經驗，還拿出佢盡愛惜個極樂仔講愛做佢學會泅水個獎

品。在大家個鼓勵之下，佢答應第二日愛過去上游泳課。

第二日朝晨，阿媽愛載佢去上游泳課，催了催佢還係啊啊奶奶³、這摸該摸毋肯停動。上課時間硬硬會赴毋著咧，阿媽發譴擊雞毛掃仔⁴愛修理佢，佢試著當委屈，又驚分阿媽打又驚去泅水，就噉到大嫵聲，歸條巷仔都聽到清清楚楚。鄰舍過來關心，知著佢係驚泅水正噉到恁大聲，做下忍等笑來鼓勵佢。就恁仔，該站時間，朝晨頭巷頭巷尾若係聽著佢又噉到噉噉滾⁵，就知該日佢又愛去上游泳課咧。

經過三禮拜個訓練，游泳課個同學一儕儕都學會泅也，同學一陣換了一陣，佢還係手同腳配合毋著，手記得划咧腳又毋記得踢，實在毋得結煞。有一日，佢自家在該練習，毋多知仔手同腳嘎配合得著哩，泅有五公尺恁遠，心肝肚實在還歡喜哪！佢續等過練，緊練緊知得該要領，手腳較省力哩，圓身也緊來緊輕鬆，佢正第一擺感受著泅水個趣味。

感謝該當時，屋下人個鼓勵，分驚水個佢面對自家個困難去學泅水，分佢有機會去克服自家較軟弱個所在，這下個佢，毋單淨曉得泅水哩，也有信心去面對人生個各種挑戰。

¹ 嚟：音 kieu^ˇ；小孩子對大人有所要求的聲音或動作。

² 沉：音 ciim；因外力所致而被推入、沒入水中。

³ 啊啊奶奶：音 a^ˊ a^ˊ nai^ˊ nai^ˊ；懶懶散散、愛理不理的樣子。

⁴ 雞毛掃仔：音 gie^ˊ mo^ˊ so e^ˊ；雞毛撻子。

⁵ 噉噉滾：音 ve ve gun^ˋ；不斷的大叫或大哭。

110 年全國語文競賽客家語朗讀文章國中學生組（四縣腔）

編號 4 號

【滿天星】李得福原作

來到屏東、姐公个菁仔園，裡肚一行行仔高天天个檳榔樹，聽講兩、三十年前，這位一分地一年做得收十過萬銀，還愛牽電火來掌菁仔。園仔裡肚係有火光，賊仔就毋敢來偷割哩，毋過今這下个菁仔無麼个價，正賣頭擺十分之一個價定定。雖然賣毋成錢，姐公還係打理到青柳柳仔，菁行中間還同佢種加兜仔時計果¹，也做得賣加一息仔錢。檳榔樹準柱頓²，利用廢電線來搭棚仔，有紅電線、烏電索、雙股个白片線，邊脣用白片線牽透龍，紅烏電線橫架直架刺³做三長過⁴个彩色時計果棚。

逐年个三月春分前後時計果開花咧，青花托撐等吊菜色个花，還有牽白鬚个花皮、副花帽；第二層係五皮青黃色个公花，合等⁵當貴个花粉；盡頂高係有三支像擰螺絲仔个扳手、又像豬仔个飯匙骨个，該就係嫵个花。佢識看過姐公擎一支毛筆，在每一蕊花頂高蘸蘸搵搵像畫圖樣仔，佢問姐公講：「阿公，你在該做

麼个？」佢指等花同佢講：「佢同公花个花粉蘸來膏在嫵花个花心頂，恁樣正會打子啊！」

棚仔頂吊到淦淦一粒粒仔青青个細果子仔，企在棚底下看往上⁶就像係滿天星斗，阿公講佢種个時計果品種就安到「滿天星」。佢兜就像係佢伸手就摸得著也摘得著、又七食得著个星仔呢！

清明過後無幾久，時計果就會轉烏黝紅，係講看啊去暗紅暗紅無青影个就做得摘咧。佢兜姊妹仔在棚仔下，臥頭一粒看過一粒定定仔相，相著係紅到轉烏色个就熟也，甜度罇擺較毋會酸。摘著有半菜籃仔就遽遽扛去倒入紙箱仔肚，一轉、兩轉、三轉同紙箱仔裝到淦淦，愛載轉高雄冰起來定定仔食。熱天放學轉，阿姆會同時計果洗淨，在蒂頭頂个外皮頂，挖⁷一隻像五十個銀恁大个空，放在水果盤頂，分佢兜拿細調羹仔定定仔舀來食。正摘啊著个時計果特別甜，佢一下去⁸就食忒七粒，酸藕酸藕緊食緊入味，連鼻公故出來个氣又七酸藕酸藕帶有時計果个味緒。

阿姆成時會同時計果裡肚个仁還過味挖出來，加一息仔冷滾水放入果汁機打，再過用盞仔裝好放冰箱冰，分佢兜準果汁啣。每擺係啣著這果汁，就會想著在果棚下煞猛做事，頭那毛蓬白、開容笑面个姐公。

¹ 時計果：音 to^ˇ kied so^ˋ；百香果，四縣腔語音源於日語「時計草」。

² 柱頓：音 cu^ˊ dun^ˋ；柱子。

³ 刺：音 qia^ˋg^ˋ；以尖銳像針的東西扎入，織。

⁴ 三長過：音 sam^ˊ cong^ˋ go；超過三長列。

⁵ 合等：音 gag^ˋ den^ˋ；分配布置著。

⁶ 看往上：音 kon gong^ˊ song^ˊ；向上看。

⁷ 挖：音 va^ˊ；用手、工具掏取或掘取。

⁸ 一下去：音 id^ˋ ha hi；一下子。

110 年全國語文競賽客家語朗讀文章國中學生組（四縣腔）

編號 5 號

【畜羊仔个叔公】羅瑞霞原作

吾公有兩兄弟，偈兜歇莊項，叔公歇在離莊頭無幾遠个石礮¹脣，叔公無討舖娘，一儕人歇在礮脣，畜十過條个羊仔。叔公講：「一儕人過日仔較自由，又毋使愁勞博激，逐日快快樂樂過日仔，幾好吔！」

偈從細就好遊遊野野，講著搞就一條線，毋過平常時，愛上課、讀書，一日到暗就係國語、數學、英文、社會、電腦，搵到偈春頭磕額，頭暈腦疼，毋過一到放寮日，該就係吾个天下哩！

偈盡好去尋叔公寮，叔公个屋面前就係石礮，石礮脣有一大片个草坪，打早羊仔就在礮脣食草仔。偈見去到該位，係有看著羊仔在該食草，就會挑挑去逐該兜羊仔，總係同羊仔逐到咩～咩～緊叫，偈試著當生趣。該央時，叔公係在屋肚聽著羊仔叫，定著會行出來看，看著偈在該逐羊仔，就罵講：「孤盲牯，又在該逐羊仔咧！毋驚下二擺降个細人仔無屎朥。」

偈看著叔公出來，黏時喊一聲：「叔公，恁早！」叔公雖然會罵偈，毋過也盡惜偈，因為偈係屋下單單个孫仔。叔公笑面笑

面个行過來，緊行緊講：「羊仔肚屎枵吔在該食草仔，你莫撩佢，落來屋肚偈拿糖仔分你食。」講著有糖仔好食，這又也係偈好來叔公屋下个原因，叔公無家竇，一儕人歇，故所長透有好食个東西都會留起來，等寮日時節拿分偈食。

叔公雖然係一儕人歇，毋過屋下整理到淨淨俐俐，桌項無半點塵灰，完全看毋出佢係單身哥仔。偈識問過阿公，叔公仰會無討舖娘？阿公講：「頭擺叔公有熟識著一個歇在莊尾个細阿妹仔，該細妹仔生來麻筍麻筍，毋過異靚、異煞猛，兩儕感情也當好，兩家人也認定愛結親家咧。無想著有一日，該細妹仔在田肚做事，嘎分蛇哥咬著，該央時个醫藥毋發達，偈兜莊下堵著恁樣个事情，大部分都係自家尋青草仔捶捶貼貼啊，就好咧！哪會知，該細妹仔係分龜殼花咬著，無黏時送到街路去分西醫看，人嘎恁樣無忒吔。」該細妹仔無忒，對叔公个打擊當大，過後，叔公完全無愛摻其它个細妹仔相行，當多人愛同叔公做媒人，都分叔公拒絕忒，叔公就一儕人徙到礮脣去歇吔。

阿公講：「係有閒，你愛較輒啊去陪若叔公哦！」好啊！叔公恁惜偈，同佢做伴無問題啦！

¹ 石礮：音 sag bog^ˋ；石隄。

110 年全國語文競賽客家語朗讀文章國中學生組（四縣腔）

編號 7 號

【大樹下】謝玉賢原作

記得佢還係細人仔個時節，屋面前有一條細河壩，河壩肚輒常會看著幾下隻鴨仔，在該泗上泗下，成時佢兜細人仔也會跳落水肚，同鴨仔共下搞水，你辱佢，佢辱你，搞到一身溼漉漉仔正轉屋。毋過，分佢印象最深个毋係該條細河壩，係河壩脣个該頭大樹。

該頭大樹，厥个名仔安到爛布樹，樹中央係空心个，毋過佢當耐命。逐年正開始熱，樹葉仔會跌到滿地泥，四叔就會蹶到樹頂，撈樹把¹剝到淨淨，毋使幾久，爛布樹又會綻筍，新樹把一支支仔，樹葉仔生到撈撈，大樹底下就係大家唱歌仔寮涼个好所在，也係細人仔搞寮个好地方。

大樹下長透坐一大堆个人，逐儕都擎等一支扇仔撥啊撥欸，在該打嘴鼓。人講「七個和尚八樣腔²」，下屋个阿真叔講厥俵仔愛做兵哩，愁到無結煞，愁佢做兵毋知會分人欺負無？愁到目汁強強會跌下來哩！上屋个叔姆，講厥妹仔下禮拜愛嫁人，喊大家

去分佢請，問大家佢兜人嫁妹仔有麼个俗無？愛砣男家頭麼个？糞耙仔愛打幾多斤？扇仔愛喊麼儕拈？帶路雞愛幾多隻？雖然有一大堆个問題，毋過叔姆還係當歡喜，暢到牙西西仔³。吾姆乜輸人毋輸陣，同大家講：「吾妹仔考著師專哩，等佢畢業就做得做先生，搵手賺錢哩！」大家你一句佢一句鬧熱煎煎仔⁴，有人愁也有人笑，實在異生趣。

大樹下，這片大人在該打嘴鼓，該片个細人仔乜無閒到講毋得，細妹仔在大樹下搞份家啦，你做爺仔佢做哀，爛布子秦起來做戩鍊、石頭結起來做烘爐、樹葉仔做青菜、樹把截仔做篾仔，大家搞到盡歡喜；細俵仔就在該搞園人尋、打紙牌，有兜人搞玻璃珠仔，有兜人灌土狗仔。這兜綻剝頭⁵，逐個精砣砣仔⁶，看著一團鬆泥就知下背有土狗仔，七手八腳搵泥、攞水、倒水，毋使幾久土狗仔就走出來哩，這陣細人仔長透搞到愛大人擎等竹修仔來尋正肯轉屋，實在異有好搞。

大樹下有佢當多个回憶，係隔壁鄰舍聯絡感情个所在，也係細人仔搞寮个地方。雖然童年離佢當遠哩，毋過童年个記憶還像昨晡日樣仔。該頭根深葉靚个爛布樹，就像係一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢回想人生个中心寄託。

¹ 樹把：音 su pa`；樹枝。

² 七個和尚八樣腔：音 qid` ge vo` song bad` iong kiong`；形容人多口雜，主張不一致，各有各的說法。

³ 牙西西仔：音 nga` xi` xi` e`；牙齒微露，輕鬆愉快的微笑。

⁴ 鬧熱煎煎仔：音 nau ngied jien` jien` e`；形容非常熱鬧的樣子。

⁵ 綻剝頭：音 can dog teu`；罵人頑皮鬼。

⁶ 精砣砣仔：音 jin` guag guag e`；精明的樣子。

【學泅水】徐姿華原作

佢一溜來斯當驚水，小學一年生該下，先生鼓勵大家學泅水，講泅水係當好個運動。佢身邊個好同學做下曉泅水咧，逞強個佢毋願輸人，轉去屋下緊嚟¹阿姆講愛去學泅水。趕避暑，阿姆摺佢尋著一間溫水個游泳池，還請著名聲盡好個教練來教佢，又買一身靚靚個連身泅水衫分佢著，鼓勵佢勇敢學泅水。

第一擺去到游泳池，又驚又好。做好體操，教練渡佢摺另外四個學生仔練習沒水、學換氣；教練摺佢兜一個一個拗落游泳池，佢兜乖乖聽教練指示，摺頭那沒落水竇肚，佢嚇到盡命牯巴等游泳池礮脣、腳踇踇毋敢沾著水、嘶骸另命、噉到凜流凜串²，像分人苦毒到當慄樣；脣頭個人做下緊看佢緊笑，教練緊拐佢，佢還係噉到失聲、毋肯落水竇肚去，高不將斯請阿姆摺佢渡轉去。

該暗晡，阿爸好聲好氣鼓勵佢續等去學泅水；阿媽斯唉唉唧唧道嘆：「若係毋去上課，學費無好退，錢斯會白白了忒去。」

阿哥也分享自家學泅水個經驗，還拿出佢當愛惜個極樂仔，講愛做佢學會泅水個獎品。在大家個鼓勵之下，佢答應第二日愛再過去上游泳課咧。

第二日朝晨，阿姆愛載佢去上游泳課，追了追佢還係生拉拉、死拉拉³、拖拖擲擲毋肯停動。上課時間強強會赴毋著咧，阿姆闕到拿起雞毛掃⁴愛修理佢，佢試著當委屈，又驚阿姆打，又驚愛下水泅水，斯噉到馬咬樣，歸條巷仔都聽到清清楚楚。鄰舍過來關心，知佢係驚泅水正噉到大嫲聲，做下忍等笑鼓勵佢。斯恁樣，該站時間，朝晨頭巷頭巷尾若係聽著佢又噉到哇哇滾，斯知該日佢又愛去上游泳課咧。

經過三隻禮拜個練習，游泳課個同學一批一批學會走忒咧，同學換了換，佢還係手摺腳配合毋著，手記得划水咧，腳又毋記得踢水，實在無結煞。有一日，佢自家練習，毋多知手摺腳嘎配合得著咧，泅有五公尺恁遠，心肝肚實在還歡喜那！佢續等練習，緊來緊熟手，手腳也緊來緊省力，臉身也緊來緊輕鬆，第一擺感受著泅水個趣味。

感謝該量時，屋下人支持也鼓勵驚水個佢面對自家個困難去學泅水，分佢有機會去克服自家軟弱個所在，這下個佢，毋單淨曉得泅水也做得堅強去迎接人生個各種挑戰。

¹ 嚟：音 kiau；言語糾纏。

² 凜流凜串：音 pi⁺ lau pi⁺ chon^ˇ；鼻涕在口鼻間上下流竄。

³ 生拉拉死拉拉：音 sang[`] lai[`] lai[`] si[`] lai[`] lai[`]；死活不肯就範。

⁴ 雞毛掃：音 gai[`] mo[`] so^ˇ；雞毛撻子。

110 年全國語文競賽客家語朗讀文章國中學生組（海陸腔）

編號 4 號

【滿天星】李得福原作

來到屏東姐公个菁園肚，看著一行一行高天天个檳榔樹，聽講二、三十年前，一分地一年做得收成十過萬銀，還愛牽電火掌菁仔，園肚係有火光，賊仔就毋敢來偷割。這下價數當便宜，正賣著頭擺十分之一個價錢，雖然賣毋成錢，姐公還係打理到青溜溜仔，因為菁行之間有加種時計果，做得賣加一息錢。檳榔樹準柱楯，利用廢電線搭棚仔，有紅電線、烏電索、雙股个白片線，脣頭用白片線牽透龍，紅烏電線橫架直架¹成三長列過个彩色時計果棚。

逐年三月春分前後，時計果開花咧，青花托撐起吊菜色个花蕾頭，還有牽白鬚个花瓣副花帽；第二層係五皮青黃色个公花，帶當貴个花粉；最頂高層係三支像擰螺絲个扳手，又像豬仔个飯匙骨，這係嫵个花。佢識看姐公拿一支毛筆，在逐蕊花頂高蘸蘸、搵搵當像畫圖樣，佢問：「姐公，你在該做麼个？」佢指等花蕾摻佢講：「佢摻公花个花粉蘸來膏在嫵花个花蕾町，恁樣正會打子結果啊！」

¹ 廣：音 gang`；織。

青青个細果子在果棚頂吊到淦淦，企在棚仔底下看往上，就像看著滿天个星仔樣。姐公講佢種个時計果品種就安到「滿天星」，當像佢伸手就摸得著也摘得著，又乜食得著个星仔呢！

清明過後無幾久，時計果就轉烏黝紅，看著暗紅暗紅無青影就做得摘咧。佢兜姊妹在果棚底下，臥起頭一隻看過一隻，慢慢仔相，相著係紅到轉烏色就熟咧，甜度罅較無恁酸。摘著半菜籃遽遽扛去倒落紙箱肚，一輪、兩輪、三輪紙箱仔張到淦淦，愛載轉高雄冰起來定定仔食。熱天放學轉來，阿姆會摻時計果洗淨，在蒂頭頂高挖一隻像五十個銀恁大个空，放在水果盤町，佢兜拿細湯匙定定仔舀來食。正摘啊著个時計果特別甜，佢一下斯食忒七、八隻，酸丟酸丟²緊食緊爽口，連鼻空畀出來个氣又乜酸丟酸丟帶有時計果个味緒。

阿姆成時會摻時計果裡肚个仁摻汁挖出來，加一息冷滾水放落果汁機去打，打好用盞仔張等放冰箱冰，分佢兜準果汁食。逐擺係咁這果汁，就會想著在果棚下歸頭白毛，笑到牙西西个姐公。

² 酸丟酸丟：音 son` diu son` diu；酸溜溜地。

【畜羊仔个叔公】羅瑞霞原作

佢公有兩兄弟，佢兜戴莊肚，叔公戴在離莊頭無幾遠个石礮脣，叔公無討舖娘，一儕人戴在礮脣，畜十過條羊仔。叔公講：「一儕人過日仔較自由，又毋使愁勞博激，逐日快快樂樂，幾好呢！」

佢從細斯好遊遊野野，講著搞就一條線¹，毋過平常時，愛上課、讀書，一日到暗斯國語、數學、英文、社會、電腦，搵到佢春頭磕額、頭暈腦疫，毋過到放寮日，該斯係佢个天下咧！

佢最愛去尋叔公寮，叔公屋面前係石礮，石礮脣有一大遍草，一大早羊仔斯在礮脣食草，佢見去到，看著羊仔在該食草，斯挑挑去追該兜羊仔，總愛摻羊仔追到咩～咩～咩緊叫，佢正試著生趣。該量時，叔公在屋肚聽著羊仔叫，一定會走出來看，看著佢在該追羊仔，斯罵講：「孤盲子，又在該追羊仔咧！毋驚下二擺降个細人仔無屎肫。」

佢看著叔公出來，黏時喊一聲「叔公，早啊！」叔公雖然會罵佢，毋過乜盡惜佢，因為佢係屋下唯一个孫仔。叔公笑弛弛仔

行過來，緊行緊講：「羊仔肚屎枵在該食草，你毋好撩佢，落來屋肚佢拿糖仔分你食。」講著有糖仔好食，這又係佢好來叔公屋下个原因，叔公無家無寶，一儕人戴，所以長透有好食个東西就會留起來，等寮日拿分佢食。

叔公雖然一儕人戴，毋過屋下整理到淨淨俐俐，桌頂無半點塵灰，完全看毋出佢係單身哥仔。佢識問過阿公，仰般叔公無討舖娘？阿公講：「頭擺，叔公識熟事一個戴在莊尾个細阿妹仔，該隻細妹仔生著麻筍麻筍已靚，當煞猛，兩儕感情盡好，兩家人也認定愛結親家、且姆咧，無想著有一日，該隻細妹仔在田町做事，毋堵好分蛇咬著，該量時醫藥毋發達，偲俚莊下堵著這種事情，大體都係自家拿草藥捶捶貼貼仔，斯好咧！旨知該隻細妹仔係分龜殼花咬著，無黏時送到街路分西醫看，就恁樣死忒去。這隻細妹仔死忒對叔公个打擊當大，過後叔公斯完全毋摻其他細妹仔交往，當多人愛摻叔公做媒人，都分叔公拒絕，一儕人斯徙到礮脣戴咧。你係有閒，愛長透去陪叔公哦！」

佢黏時應講：「好啊！叔公惜佢，摻佢做伴無問題啦！」

¹ 一條線：音 rhid tiau sien^ˋ；喻專注於一事。

110 年全國語文競賽客家語朗讀文章國中學生組（海陸腔）

編號 7 號

【大樹下】謝玉賢原作

記得做細人个時節，佢屋下面前有條細河壩，河壩肚長下看著有幾下隻鴨仔在該泗上泗下，成時佢兜細人仔也會跳落去，摺鴨仔共下搞水，你屌佢，佢屌你，搞到歸身溼漉漉正轉。毋過，分佢印象最深个毋係該條細河壩，係河壩脣个該頭大樹。

該頭大樹，佢个名仔安到爛布樹，樹中央係空心个，毋過佢當耐命，逐年正開始熱，樹葉仔斯跌到滿地泥，四叔就蹶到樹頂，摺樹極鏝¹到淨淨，毋使幾久，爛布樹又會綻筍，樹極一枝一枝，葉仔生到淄淄，大樹底下就係大家唱歌奈涼个好所在，也係細人仔搞奈个好地方。

大樹下長透坐一大群人，逐儕都擎等一支扇仔撥啊撥仔，在該打嘴鼓，七個和尚八樣腔²，下屋个阿真叔講厥俵仔愛做兵咧，佢逐日愁到無結無煞，愁俵仔做兵毋知會分人欺負無？見擺講起斯目汁漉漉跌³；上屋个叔姆，就講佢个妹仔下禮拜愛嫁人，喊大家分佢請，問大家嫁妹仔有麼个禮俗無？愛砵男家頭麼个？菜粇

愛打幾多斤？扇仔愛分麼儕拈？帶路雞愛幾多隻？雖然有一大堆个問題，毋過叔姆還係當歡喜，暢到牙西西⁴；佢姆乜輸人毋輸陣，摺大家講妹仔考著師專咧，加幾年卒業就做得做先生，搵手賺錢咧。大家你一句、佢一句鬧熱煎煎⁵，有人噉也有人笑，實在還生趣。

大樹下，這片大人在該打嘴鼓，該片个細人仔乜無聞著，細妹仔在大樹下搞份家啦，你做爺仔佢做哀，爛布子串起來做戩鍊、石頭結起來做烘爐；樹葉仔做青菜、樹極做箸，大家搞到當歡喜。細俵仔有兜在該搞園人尋、打紙牌；有兜搞圓子、透土狗仔⁶，這兜綻剝頭⁷，逐個精砵砵仔⁸，看著一團鬆泥就知下背有土狗仔，七手八腳摺鬆泥要開⁹、攞水、倒水，毋使幾久土狗仔就走出來咧，這群細人仔長透搞到愛大人擎等竹修仔喊正肯轉屋下，實在無結煞。

大樹下有佢當多个回憶，係隔壁鄰舍聯絡感情个所在，也係細人仔搞奈个好地方。雖然童年離佢當遠咧，毋過記憶肚个童年還像人在昨晡日樣；該頭根深葉靚个爛布樹，就像一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢生命中精神个寄託。

¹ 鏝：音 loi^ˇ；削平。

² 七個和尚八樣腔：音 cid gai^ˇ vo shong+ bad rhong+ kiong^ˋ；；形容人多口雜，主張不一致，各有各的說法。

³ 目汁漉漉跌：音 mug zhib dab^ˋ dab^ˋ died；淚流不止。

⁴ 牙西西：音 nga si^ˋ si^ˋ；牙齒微露，輕鬆愉快的微笑。

⁵ 鬧熱煎煎：音 nau+ ngied^ˋ zien^ˋ zien^ˋ；形容非常熱鬧的樣子。

⁶ 透土狗仔：音 teu⁺ tu^ˋ gieu^ˋ er；灌蟋蟀。

⁷ 綻剝頭：音 can^ˋ dog^ˋ teu；頑皮鬼。

⁸ 精砵砵仔：音 zin^ˋ guag^ˋ guag^ˋ er；精明的樣子。

⁹ 要開：音 fung^ˋ koi^ˋ；撥開。

【 泗身 】徐姿華原作

佢自溜當驚水，小學一年生該下，先生鼓勵大家學泗身，講泗身係當好個運動，身邊個好同學做下學曉泗身咧，逞強個佢毋願輸人，轉去屋家緊嚙¹阿媽講愛去學泗身。趁暑假，阿媽替佢尋著一間溫水個游泳池，還問著名聲盡好個教練來教佢，過買一身靚靚個連身游泳衫分佢，鼓勵佢勇敢學泗身。

第一到去到游泳池，又驚又好。做好體操，教練帶佢同另外四個學生練習沒濟汨、學換氣；教練同吾等一個一個拗落游泳池，厥等乖乖聽教練指示，同頭那沒入水竇，佢嚇去胚命攀核游泳池棚²、腳虬虬毋敢沾著水、抽骸另命、噉去目流凜串，像分人苦毒去真慘個樣相；脣項個人做下緊看佢緊笑，教練緊拐佢，佢還係噉都諗聲、毋肯落水，高不將斯請阿媽同佢帶轉去。

該暗晡，阿爸好聲好氣鼓勵佢繼續去學泗身；阿媽斯唉唉嘆道嘆：若毋去上課斯會白白了撇學費，無好退；阿哥也分享自家學泗身個經驗，還拿出佢盡愛惜個極樂講愛做佢學曉泗身個獎

品。在大家個鼓勵之下，佢答應第二日愛過去上游泳課。

第二日朝脣，阿媽愛載佢去上游泳課，催了催佢還係生拉拉死拉拉³、拖拖擲擲毋肯停動。上課時間硬硬會毋赴咧，阿媽起諗拿出雞毛掃⁴愛修理佢，佢試著當委屈，又驚阿媽打又驚愛落水泗身，斯噉去鬼撚著個樣，歸條巷都聽去清清楚楚。鄰舍過來關心，知著佢係驚泗身正在放命，做下忍核笑鼓勵佢。斯恁泥，該站時間，朝脣頭巷頭巷尾若係聽著佢又噉去嫵嫵滾，斯知該日佢又愛去上游泳課咧。

經過三個禮拜個練習，游泳課個同學一批一批學曉走咧，同學換了換，佢還係手同腳搵動毋著⁵，手記得划水咧腳又毋記得踢水，實在毋得結煞。有一日，佢自家練習，毋多知手同腳配合得著咧，泗有五公尺恁遠，心肝肚實在還歡喜啦！佢繼續練習，越來越熟手，手腳越來越省力，圓身也緊來緊輕鬆，第一擺感受著泗身個趣味。

感謝該當時，屋家人支持也鼓勵驚水個佢面對自家個困難去學泗身，分佢有機會去克服自家軟弱個所在，這下個佢，毋單淨曉得泗身也使得硬程迎接人生個各種挑戰。

¹ 嚙：音 kiauˋ；言語糾纏。

² 游泳池棚：音 rhiuˋ rhunˋ chiˋ penˋ；游泳池邊緣。

³ 生拉拉死拉拉：音 sang+ lai+ lai+ siˋ lai+ lai+；死活不肯就範。

⁴ 雞毛掃：音 gie+ mo+ soˋ；雞毛撻子。

⁵ 搵動毋著：音 tenˋ tungˋ mˋ doˋ；配合不上。

110 年全國語文競賽客家語朗讀文章國中學生組（大埔腔）

編號 4 號

【滿天星】李得福原作

來到屏東外阿公个菁園肚，一行一行高天天个檳榔樹，聽講二、三十年前，一分地一年使得收十外萬，還愛牽電火掌菁，園肚係有火光，賊斯毋敢來偷割。今這下價數毋好，伸著過去个十分之一個錢，雖然賣毋成錢，外阿公還係治理都青溜溜，因致菁行之間有加種時鐘墜¹，使得加賣一屑錢。檳榔樹準柱樁，利用廢電線牽棚，有紅電線、烏電索、雙股个白片線，邊脣用白片線牽透籠，紅烏電線橫架直架牽做三長列个彩色時鐘墜棚。

逐年三月春分前後時計果開花咧，青花托撐起吊菜色个花蕾頭，還有牽白鬚个花瓣副花帽；第二層係五皮青黃色个公花，帶有貴貴个花粉；盡上層係三支像擰螺絲个擰塵，又像豬个飯匙骨，這係嫵个花。佢識看外阿公拿一支毛筆，在逐蕊花頂高蘸蘸搵搵斯像畫圖个樣，佢問：「阿公你在做麼个？」佢指花蕾同佢講：「佢將公花个花粉蘸來膏在嫵花个花蕾肚，恁泥正會打子結果啊！」

棚面吊緊一粒一粒青青个細果粒，企在棚底下看往上斯像滿

天星斗，外阿公講佢種个時鐘墜品種安做「滿天星」。已像佢伸手斯摸得著也摘得著，又七食得著个星子呢！

清明過後無幾久，時計果斯轉烏黝紅，看佢暗紅暗紅無青影斯使得摘咧。吾等姊妹在棚下，頭臥臥一粒看過一粒慢慢相，相著係紅去轉烏色斯熟咧，甜度罅較無恁酸。摘著半菜籃遽遽扛去倒入紙箱肚，一掖兩掖三掖紙箱張都恁恁，愛載轉高雄冰起來慢慢食。熱天放學了後，阿姆會將時計果洗淨對蒂頭个外皮項，摟一個像 50 個銀恁大个空，放在水果盤項，吾等拿細湯匙舀來食。正摘个時計果特別甜，佢一下斯食撇七粒，酸藕酸藕个味瑞緊食緊爽口，連鼻公敲出个氣又七酸藕酸藕帶有時鐘墜个味瑞。

阿姆成半下會將時計果裡肚个仁同汁挖出來，加一屑冷滾水放入果汁機打汁，張入盞肚放冰箱。逐擺係咁這果汁，斯會想著在果棚下歸頭那毛白雪雪，牙噉噉笑个外阿公。

¹ 時鐘墜：音 shi` zhung+ chui`；百香果。也稱「時計果 to+ gie` so`」。

110 年全國語文競賽客家語朗讀文章國中學生組（大埔腔）

編號 5 號

【畜羊个叔公】羅瑞霞原作

吾爹有兩兄弟，吾等戴莊肚，叔公戴在離莊頭無幾遠个石砌脣，叔公無討舖娘，一個人戴在砌脣，畜有十外隻羊。叔公講：一個人過日較自由，又毋使愁這愁該，逐日樂暢樂暢過日，幾好呢！

佢自細斯好遊遊野野，講著搞斯一條線，毋過平常時愛上課、讀書，一日到暗斯國語、數學、英文、社會、電腦，搵都佢春頭磕額，頭暈腦疫，毋過到放棄日，該斯係吾天下咧！

佢盡好去尋叔公寮，叔公屋面前係石砌，砌脣有一大片草坪，打早羊在砌脣食草，佢見去到，看著羊在該食草，斯挑挑去逐該羊，總愛同羊逐都咩～咩～緊噉，佢斯試著當生趣，這時節，叔公聽著羊在噉，定著會走出來看，看著佢在該逐羊，斯罵講：孤盲牯，又在該逐羊咧！毋驚下次擺降个細人無屎咄咩。

佢看著叔公出來，黏時喊一聲「叔公，早啊！」叔公雖然會罵佢，毋過佢已惜佢，因為佢係屋家唯一个孫。叔公笑咪咪行過來，緊行緊講：羊肚屎枵咧在該食草，你莫撩佢，入來屋肚佢拿糖分你食。講著有糖好食，這七係佢好來叔公屋家个原因，叔公

無家無寶，自家一個人戴，長在有好食个東西斯會留分佢食。

叔公雖然一個人戴，毋過屋家整理都淨淨俐俐，桌項無半點塵塵，一屑都看毋出叔公係單身哥。佢識問阿爹，做麼叔公無討舖娘？阿爹講：「頭擺，叔公有熟事一個戴在莊尾个細阿妹，該个細妹生來高大砸礮已靚，當煞猛，兩儕感情當好，兩家人也認定愛結親家咧，無想著有一日，該个細妹在田項做事，毋堵好分蛇咬著，該央時醫藥毋發達，莊下若堵著這兜事情，大部份係自家拿草藥槌綿來膏斯好咧！告知該个細妹係分龜殼花咬著，無黏時送去街路分西醫注射，將恁泥死撇咧。這個細妹死撇對叔公打擊當大，過後，叔公完全無愛同其它細妹交往，當多人愛同叔公做媒人，做下分叔公回絕，叔公一個人斯徙到砌脣戴咧。」

阿爹講：「係有閒，你愛長在去尋叔公寮哦！」叔公恁惜佢，同佢做伴無問題啦！

110 年全國語文競賽客家語朗讀文章國中學生組（大埔腔）

編號 7 號

【大樹下】謝玉賢原作

記得做細人個時節，吾屋面前有一條細圳溝，圳溝肚輒輒看著有幾隻鴨，在該汨上汨下，成半下吾等細人也會跳落水竇，同鴨共下搞水，你庠你，你庠你，搞都歸身溼漉漉正轉。毋過，分你印象盡深個毋係該條細圳溝，係圳溝脣個該頭大樹。

該頭大樹，厥名安做潑泡籽樹，樹中央係空心個，毋過佢當耐命，逐年正開始熱，樹葉斯跌都滿地泥，四叔會跋上樹頂，將樹極斫斫落來，毋使幾久，潑泡籽樹又會綻筍，樹極一支一支，樹葉生都榮榮，大樹底下斯係大家唱歌寮涼個好所在，也係細人搞寮個好地方。

大樹下長在坐一大陣人，逐儕都擎一支扇撥啊撥，在該打嘴鼓，七個和尚八樣腔¹，下屋個阿真叔講厥俵愛做兵咧，愁都會死，愁佢做兵毋知會分人欺負無？愁去目汁硬硬會跌落來咧；上屋個叔姆，講厥妹下禮拜愛嫁人，喊大家分佢請，還問大家嫁妹有麼個風俗無？愛砵男家麼個？粢粢愛打幾多米？扇愛分麼人

¹ 七個和尚八樣腔：音 cid` gai` vo` shong` bad` rhong` kiong+；形容人多口雜，主張不一致，各有各的說法。

拈？帶路雞愛幾多隻？雖然有一大堆個問題，毋過叔姆還係當歡喜，暢都牙西西²；吾姆也輸人不輸陣，同大家講妹考著師專，加幾年卒業斯使得做先生賺錢咧。大家你一句你一句鬧熱濟借³，有人噉也有人笑，實在還生趣。

大樹下，這片大人在該打嘴鼓，該片個細人也無閒著，細妹在大樹下搞份家啦，你做爺你做哀，潑泡籽泰起來做敲鍊，石頭結疏來做烘爐，樹葉做青菜，樹極做篾，大家搞都已歡喜；細俵斯在該搞園人尋、打面果；有兜搞他瑪珠、灌土狗，這兜鱸鰻頭⁴，逐個精砵砵⁵，看著地泥下一團鬆泥斯知下背有土狗，七手八腳搨泥、攪水、倒水，毋使幾久土狗斯走出來咧，這陣細人長在搞都愛大人擎竹修咧正肯轉屋家，實在當好笑。

大樹下有吾當多個回憶，係隔壁鄰舍聯絡感情個所在，也係細人搞寮個所在。雖然童年離佢當遠咧，毋過童年個記憶還係像在昨晡日個樣；該頭根深葉靚個潑泡籽樹，斯像一支大大支個遮，保護吾等行過艱難又辛苦個日，該頭堅韌又耐命個大樹，到這下還係吾生命中精神個寄託。

² 牙西西：音 nga` si+ si`；牙齒微露，輕鬆愉快的微笑。

³ 鬧熱濟借：音 nau` ngied` zi` zia`；形容非常熱鬧的樣子。

⁴ 鱸鰻頭：音 lu` man` teu`；罵人頑皮鬼。

⁵ 精砵砵：音 zin+ guag` guag`；精明的樣子。

110 年全國語文競賽客家語朗讀文章國中學生組（饒平腔）

編號 2 號

【學泅水】徐姿華原作

佢從溜當驚水，小學一年生該下，先生鼓勵大家學泅水，講泅水係當好個運動，身邊個好同學做下學曉泅水咧，逞強個佢毋願輸人，轉去屋下緊嚟阿媽講愛去學泅水。趕避暑，阿媽摺佢尋著一間暖燒水¹個游泳池，還問著名聲最好個教練來教佢，過買一身靚靚個連身泅水衫分佢，鼓勵佢勇敢學泅水。

第一擺去到游泳池，又驚又好。做好體操，教練帶佢摺另外四個學生練習泅水仔、學換氣；教練摺佢兜一個一個拗落游泳池，佢兜乖乖聽教練指示，摺頭那浸入水竇，佢嚇到拚命扳等游泳池旁脣、腳趺趺毋敢沾著水、抽骸另命、嚟到目汁濺汨，像分人枯毒到當慘樣；脣頭個人做下緊睜佢緊笑，教練緊拐佢，佢還係嚟到失聲、毋肯落水，高不將斯請阿媽摺佢帶轉去。

該暗晡，阿爸好聲好氣鼓勵佢繼續去學泅水；阿媽斯唉啣啣啣嘆：「若係毋去上課斯會白白了忒學費，無好退！」阿哥也分享自家學泅水個經驗，還提出佢最愛惜個極樂仔，講愛做佢學會泅水個獎品。在大家個鼓勵之下，佢答應第二日愛再過去上泅

¹ 暖燒水：音 nun shau^ˇ fi^ˋ；溫水。

水課。

第二日晨早，阿媽愛載佢去上泅水課，催了催，佢還係三拉拉四拉拉²、拖拖擲擲毋肯停動。上課時間睜等就會赴毋著咧，阿媽發闕提出雞毛掃³愛修理佢，佢試著當委屈，又驚阿媽打、又驚愛泅水，斯嚟到失聲，歸條巷仔都聽到清清楚楚。鄰舍過來關心，知著佢係驚泅水正嚟到大嬾聲，做下忍等笑鼓勵佢。斯恁樣，該站時間，晨早時巷頭巷尾若係聽著佢又嚟到嬾嬾滾，斯知該日佢又愛去上泅水課咧。

經過三隻禮拜個練習，泅水課個同學一枋一枋學會走咧，同學換了換，佢還係手腳和毋著，手記得划水咧、腳又毋記得蹬水，實在無結煞。有一日，佢自家練習，毋多知，手摺腳合得著咧，泅有五公尺恁遠，心肝肚實在還歡喜啦！佢-續等練習，越來越熟手，手腳越來越省力，臉身也緊來緊輕鬆，第一擺感受著泅水個趣味。

感謝該量時，屋下人個支持摺鼓勵，分佢有機會去面對自家軟弱個所在，這下個佢，毋單淨曉得泅水，也做得迎接人生個各種挑戰。

² 三拉拉四拉拉：音 sam^ˇ lai^ˇ lai^ˇ si^ˋ lai^ˇ lai^ˇ；一再推拖不肯就範。

³ 雞毛掃：音 gie^ˇ mo^ˇ so^ˋ；雞毛撻子。

110 年全國語文競賽客家語朗讀文章國中學生組（饒平腔）

編號 4 號

【滿天星】李得福原作

來到屏東姐公个菁園肚，就睺得著一行一行高天天个檳榔樹，聽講二、三十年前，一分地一年做得收成十過萬銀，還愛牽電火掌菁仔，園肚係有火光，賊仔就毋敢來偷割。今這下價數當便宜，正賣頭擺个十分之一，雖然賣毋成錢，姐公還係打理到青溜溜仔，因為菁行之間有加種時計果，做得賣加一息錢。檳榔樹準柱樁，利用廢電線牽棚仔，有紅電線、烏電線、雙股个白片線，邊脣用白片線牽透壟，紅烏電線橫架直架織成三長股¹个彩色時計果棚。

逐年个三月，春分前後時計果會開花，青花托撐起茄色个花蕾頭，還有牽白鬚个花瓣副花帽；第二層係五皮青黃色个公花，帶等當貴个花粉；最頂高係三支像擰螺絲个活動扳手，又像豬仔个飯匙骨，這係嫲花。佢識睺姐公提一支毛筆，在逐蕊花頂高蘸蘸搵搵當像畫圖樣，佢問：「阿公！你在該做麼个？」佢指等花蕾摺佢講：「佢摺公花个花粉蘸來膏在嫲花个花蕾頂高，恁樣正會打子結果啊！」

¹ 三長股：音 sam^ˇ chong gu^ˋ；三長列。

等到棚架懸滄一粒粒青青細果子个時節，企在棚底下睺往上，就像滿天星斗，阿公講佢種个時計果品種就安到「滿天星」。當像佢伸手就摸得著、也摘得著，又乜食得著个星仔呢！

清明過後無異久，時計果就轉烏黝紅，睺啊去，暗紅暗紅無青影就做得摘咧。佢兜姊妹在棚底下，臥頭一隻睺過一隻，慢慢仔相，相著係紅到轉烏色就熟咧，係甜度罇擺斯較無恁酸。摘有半菜籃就遽遽扛去漕入紙箱肚，一輪、兩輪、三輪，等紙箱張到滄滄，就做得載轉高雄冰起來定定仔食。熱天放學後，阿姆會摺時計果洗淨，在蒂頭脣个外皮挖一隻像五十個銀恁大个空，放在水果盤肚，佢兜會提細湯匙定定仔舀來食。正摘啊著个時計果特別甜，佢一下仔²就食忒七隻，該味酸藕酸藕緊食緊熱嘴，連鼻空敲出來个氣乜係酸藕酸藕，還帶有時計果个味緒。

阿姆下把仔會摺時計果裡肚个仁摺汁挖出來，加一息冷滾水落果汁機打，再過用盞仔張好放冰箱冰，分佢兜準果汁啲。逐擺係啲這果汁，就會想著在果棚下歸頭那毛雪白，笑到牙西西个姐公。

² 一下仔：音 rhid^ˋ ha^ˊ er^ˋ；一下子。

110 年全國語文競賽客家語朗讀文章國中學生組（饒平腔）

編號 5 號

【畜羊仔个叔公】羅瑞霞原作

佢公有兩兄弟，佢兜戴莊肚，叔公戴在離莊頭無幾遠个石礮脣，叔公無討舖娘，一儕人戴在礮脣，畜咧十過條个羊仔。叔公講：「一儕人過日較自由，又毋使愁勞博激，逐日快快樂樂過日仔，幾好呢！」

佢從細斯好遊遊野野，講到爽就一條線，毋過平常時，愛上課、讀書，一日到暗斯國語、數學、英文、社會、電腦，搵到佢春頭磕額、頭暈腦疫，毋過到放寮日，該斯係佢个天下咧！

佢最愛去尋叔公寮，叔公屋下面前係石礮，石礮脣有一大片草，一大早羊仔在礮脣食草，佢見去到，睺著羊仔在該食草，斯會挑挑去逐該羊仔，總愛摺羊仔逐到咩～咩～緊嘍，佢斯試著當心色，該量時，叔公在屋肚聽著羊仔嘍，一定會走出來睺，睺著佢在該逐羊仔，斯罵講：「孤盲子，又在該逐羊仔咧！毋驚下二擺降个細人仔無屎肫。」

佢睺著叔公出來，黏時喊一聲：「叔公，早啊！」叔公雖然會罵佢，毋過乜盡惜佢，因為佢係屋下唯一个孫仔。叔公笑弛弛仔行過來，緊行緊講：「羊仔肚屎枵在該食草，你莫撩佢，落來

屋肚，佢提糖仔分你食。」講著有糖仔好食，這又係佢好來叔公屋下个原因。叔公無家寶，一儕人戴，所以長透有好食个東西就會留起來，等寮日提分佢食。

叔公雖然一儕人戴，毋過屋下整理著淨淨俐俐，桌頂無半點塵灰，完全睺毋出叔公係單身哥仔。佢識問過阿公，仰般叔公無討舖娘？阿公講：「頭擺，叔公有熟事一個戴在莊尾个細阿妹仔，該隻細妹仔生著麻筍麻筍異靚，當煞猛，兩儕感情當好，兩家人乜認定愛做親家、且姆咧，無想著有一日，該隻細妹仔在田肚做事，毋堵好分蛇咬著，該量時醫藥毋發達，偲佢莊下堵著這兜事情，大部份都係自家提草藥捶捶貼貼斯好咧！旨知該隻細妹仔係分龜殼花咬著，無黏時送到街路分西醫睺，就恁樣過身忒。這隻細妹仔死忒對叔公打擊當大，過了後，叔公完全無愛摺其他細妹仔交往，當多人愛摺叔公做媒人，都分叔公拒絕，叔公一儕人斯徙到礮脣戴到今。」

阿公還講：「係有閒，你愛較輒兜去陪叔公哦！」佢也應：「好啊！叔公恁惜佢，摺佢做伴無問題啦！」

110 年全國語文競賽客家語朗讀文章國中學生組（饒平腔）

編號 7 號

【大樹下】謝玉賢原作

記得做細人個時節，佢屋面前有條細溪壩，溪壩肚輒常脛著有幾隻鴨仔在該泗上泗下，成時佢兜細人仔也會跳落水肚，摺鴨仔共下爽水，你庠佢，佢庠你，爽到歸身溼漉漉正轉。毋過，分佢印象最深個毋係該條細溪壩，係溪壩脢個該頭大樹。

該頭大樹，佢個名仔安到「爛布樹」，樹中央係空心個，毋過佢當耐命，逐年正開始熱，樹葉會跌到滿地泥，四叔就蹶到樹頂，摺樹極剝到淨淨，毋使幾久，爛布樹又會綻筍，樹極一支一支、樹葉生到榮榮，大樹底下就變成大家唱歌、寮涼個好所在，也係細人仔爽寮個好地方。

大樹下長透坐等一大群人，逐儕都擎等一支扇仔撥啊撥，在該打嘴鼓，七個和尚八樣腔¹，下屋個阿真叔講厥俵仔愛做兵咧，愁到無結無煞，愁佢做兵毋知會分人欺負無？愁到目汁強強會跌下來咧；上屋個叔姆，就講厥妹仔下禮拜愛嫁人，喊大家分佢請，佢問大家嫁妹仔有麼個風俗無？愛砣男家頭麼個？棗粑愛打

¹ 七個和尚八樣腔：音 cid` gai` vo shong` bad` rhiong` kiong`；形容人多口雜，主張不一致，各有各的說法。

幾多斤？扇仔愛分麼儕拈？渡路雞愛幾多隻？雖然有一大堆個問題，毋過叔姆還係當歡喜，暢到牙西西²；佢姆乜輸人不輸陣，摺大家報妹仔考著師專咧，加幾年卒業就做得做先生，搵手賺錢咧。大家你一句、佢一句鬧熱煎煎³，有人嘍、也有人笑，實在當心色。

大樹下，這片大人在該打嘴鼓，該片個細人乜無閒著，細妹仔在大樹下爽份家啦，你做爺仔、佢做哀，爛布子串起來做敲鍊，石頭結起來做風爐，樹葉做青菜，樹極做箸，大家爽到盡歡喜；細俵仔會在該爽園人尋、打紙牌，有兜爽圓子、灌土狗仔，這兜綻剝頭⁴，逐個精砣砣仔⁵，脛著一團鬆泥就知下背有土狗仔，七手八腳掘泥、攞水、漕水，毋使幾久土狗仔就走出來咧，這群細人仔長透爽到愛大人擎等竹修仔追正肯轉屋下，實在當好笑。

大樹下有佢當多個回憶，係隔壁鄰舍聯絡感情個所在，也係細人仔爽寮個地方。雖然童年離佢當遠咧，毋過童年個記憶還係像在昨晡日樣；該頭根旺葉靚個爛布樹，就像一支大大支個遮仔，保護佢兜行過艱難又辛苦個日仔，該頭堅韌又耐命個大樹，到這下還係佢生命個寄託。

² 牙西西：音 nga si` si`；牙齒微露，輕鬆愉快的微笑。

³ 鬧熱煎煎：音 nau` ngied zien` zien`；形容非常熱鬧的樣子。

⁴ 綻剝頭：音 can` dog teu；罵人頑皮鬼。

⁵ 精砣砣仔：音 zin` guag guag er`；精明的樣子。

110 年全國語文競賽客家語朗讀文章國中學生組（詔安腔）

編號 2 號

【學泅水】徐姿華原作

佢自一溜真驚水，小學一年個時，先生鼓勵大家學泅水，講泅水係真好個運動，膺身脣個好同學做下學會曉泅水啊，逞強個佢毋願輸人，轉去屋下直亂阿依講討去學泅水。趁暑假，阿依拗佢尋著一間溫水個泅水池，猶問著名聲真好個教練來教佢，攞買一身靚靚個連身泅水衫得佢，鼓勵佢勇敢學泅水。

第一擺去到泅水池，又驚又愛。做好體操，教練渡佢和另外四個學生練習藏水覓、學換氣；教練拗佢人一個一個攙落泅水池，佢人乖乖聽教練指示，拗頭那藏入水底，佢驚到拚命揪核泅水池脣、腳踇踇毋敢沾著水、唉天唉地、嘍到目汁和鼻流流，像得人苦毒到真慘個樣；脣頭個人做下著面脛佢著面笑，教練直直拐佢，佢猶係嘍到無聲、毋肯落水，即無法度啊正請阿依拗佢渡轉去。

遐暗夜，阿怙好聲好氣鼓勵佢繼續去學泅水；阿依即唉唉唧唧感嘆：若毋去上課即會白白了學費，無通退；阿哥嘛分享自家學泅水個經驗，猶提出佢頭寶惜個摔講討做佢學會曉泅水個獎品。在大家個鼓勵之下，佢答應第二日討攞去上泅水課。

第二日晨早，阿依討載佢去上泅水課，催啊催佢猶係罔唉罔唉、拖拖趑趑毋肯停動。上課時間硬硬討毋會赴啊，阿依起性地擎出雞毛筴¹討修理佢，佢感覺真委屈，又驚阿依拓又驚愛落水泅水，即嘍到大嫲聲，歸條巷攞聽到清清楚楚。屋邊過來關心，知佢係驚泅水正嘍到大嫲聲，做下忍著笑鼓勵佢。即恁，遐站時間，晨早時頭巷頭巷尾若係聽著佢又嘍到唉唉嘍，即知遐日佢又愛去上泅水課啊。

經過三個禮拜個練習，泅水課個同學一批一批學會曉走啊，同學換了攞換，佢猶係手和腳配合毋會著，手記得划水啊腳又添放踢水，實在無奈何。有一日，佢自家練習，手和腳嘎配合會著啊，泅有五公尺恁遠，心肝底實在真歡喜啦！佢繼續練習，越來越熟手，手腳越來越省力，膺身嘛越來越輕鬆，第一擺感受著泅水個心色。

感謝遐時，屋下人支持嘛鼓勵驚水個佢面對自家個困難去學泅水，得佢有機會去克服自家軟弱個所在，這滿個佢，毋單會曉泅水，嘛會有信心迎接人生個各種挑戰。

¹ 雞毛筴：音 ge^ˊ hm^ˊ cing^ˊ；雞毛撻子。

110 年全國語文競賽客家語朗讀文章國中學生組（詔安腔）

編號 4 號

【滿天星】李得福原作

來到屏東外公个檳榔園，一行行高天天个檳榔樹，聽講二、三十年前，一分地一年會用收成十外萬銀，猶愛牽電火顧檳榔，園內底若有火光，賊即毋敢來偷割。今價數真便宜，正賣過去十分之一個錢，雖然賣毋成錢，外公猶係整理到青拚拚，因為檳榔行之間有加種百香果，會用加賣一兜仔錢。檳榔樹準柱，利用廢電線搭棚，有紅電線、烏電索、雙股个白片線，邊脣用白片線牽透籠，紅烏電線橫牽直牽織成三長列个彩色百香果棚。

逐年个三月春分前後，百香果開花啊，青花托撐起茄色个花蕾頭，猶有牽白鬚个花瓣副花帽；第二緣係五皮青黃色个公个花，有真貴个花粉；頭面上緣係三支像開螺絲个活動扳手，又像豬个飯匙骨，這係嫵个花。僮識睭外公擎一支毛筆，在逐蕊花面上搵來搵去真像畫圖个樣，僮問：「阿公你在做麼个？」佢比著花蕾拗僮講：「僮拗公花个花粉搵來膏在嫵花个花蕾面上，僮正會打子結果啊！」

棚嶼吊滿一粒粒青青个細粒果子，企在棚下睭起去即像滿天星斗，阿公講佢種个百香果品種即號做「滿天星」。親像僮伸手

即摸會著嘛拚會著，擱嘛食會著个星呢！

清明過後無幾久，百香果即轉烏黝紅，睭過去暗紅暗紅無青影即會用拚啊。僮人姊妹在棚下，臥頭一粒睭過一粒慢慢相，相著若係紅到轉烏色即到分啊，甜度罅較無恁酸。拚到半菜籃攔緊扛去漕入紙箱，一擺兩擺三擺紙箱裝到淦淦，討載轉高雄冰起來款款食。熱天放學了後，阿依會拗百香果洗淨俐，在蒂頭个外皮，糝一個像五十箍銀角仔恁大个空，園在水果盤面上，僮人擎細支湯匙款款糝來食。正拚个百香果特別甜，僮一下即食七粒，酸淦酸淦越食越爽口，連鼻空散出个氣嘛酸淦酸淦帶有百香果个味素。

阿依有時會拗百香果內底个仁和汁糝出來，加一兜冷滾水園落果汁機打，正擱用盞仔裝好園入冰箱冰，得僮人準果汁啲。逐擺若啲著這兜果汁，即會想著果棚下遐個歸頭那毛白雪雪，笑到嘴嘆嘆个外公。

110 年全國語文競賽客家語朗讀文章國中學生組（詔安腔）

編號 5 號

【供羊个叔公】羅瑞霞原作

侄公有兩兄弟，侄人蹓莊底，叔公蹓在離莊頭無幾遠个石礮脣，叔公無渡夫娘，一個人蹓在礮脣，供十外隻个羊。叔公講：一個人過日較自由，攞毋使操心擘腹，逐日快快活活過日，幾好咧！

侄自細即愛滿哪位去，講著賞攞走若飛，毋過普通時，愛上課、讀書，一日到暗即國語、數學、英文、社會、電腦，舞到侄春頭磕額，頭暈腦脹，毋過一到歇暍日，遐即係侄个天下啊！

侄頭愛去尋叔公寮，叔公屋下頭前係石礮，石礮脣有一大片个草，打早羊在礮脣食草，侄見去到位，脛著羊在遐食草，即挑持去捎羊，總愛拗羊捎到咩～咩～直直咩，侄即感覺真心色，遐時，叔公在屋內聽著羊咩咩，定著會走出來脛，脛著侄在捎羊，即罵講：死孩子，攞在遐捎羊！毋驚後次擺降个細子無屎肫。

侄脛著叔公出來，黏時喊一聲「叔公，勢早啊！」叔公雖然會罵侄，毋過嘛真惜侄，因為侄係屋下唯一个孫。叔公笑咪咪行過來，若行若講：羊食肚枵在遐食草，你莫創治佢，入來屋內侄

提糖得你食。講著有糖好食，這又係侄愛來叔公屋下个原因。叔公無家無藪，一個人蹓，所以，有好食个物件攞會留起來，等歇暍日提得侄食。

叔公雖然自家蹓，毋過屋下整理到淨淨俐俐，桌嶼無半點泥粉，歸下脛毋會出叔公係羅漢腳。侄識問過阿公，仰子叔公無渡夫娘？阿公講：「較早叔公有熟事一個蹓在莊尾个妹子，遐个妹子生做有肉攞真靚，做事真認真，兩儕感情真好，兩火灶嘛認定討結親家，無想著有一日，遐个妹子在田底做事，毋堵好得蛇咬著，遐時醫藥無發達，偲莊下堵著這兜事情，大部份攞係自家提草藥舂舂膏膏，即好啊！哪會知遐个妹子係得龜殼花咬著，無黏時送去街路得西醫脛，即恁死去。這個妹子死去對叔公打擊真大，過了後，叔公攞無愛和別个妹子行，真多人討拗叔公做媒人，攞得叔公拒絕，叔公一個人即徙到礮脣蹓啊。」

阿公講：「若係有閒，你愛較輒去和叔公做伴哦！」好啊！叔公惜侄，和佢做伴無問題啦！

110 年全國語文競賽客家語朗讀文章國中學生組（詔安腔）

編號 7 號

【大樹下】謝玉賢原作

記得做細子個時，佢屋下頭前有一條細條溪，溪底輒輒脛著有幾下隻鴨，在遐汨來汨去，有時佢人細子嘛會跳落水底，和鴨共下賞水，你戽佢，佢戽你，賞到歸身溼漉漉正轉。毋過，得佢印象頭深个毋係遐條細條溪，嘎係溪脣个遐頭大樹。

遐頭大樹，佢个名號做爛布子，樹中央係空心个，毋過佢真耐命，逐年正開始熱，樹葉會跌到歸泥下，四叔即會跋到樹嶺，拗樹極剝到淨淨，毋使幾久，爛布子又會發穎，樹極一支支，樹葉生到𠵹𠵹¹，大樹下即係大家唱歌寮涼个好所在，嘛係細子人賞寮个好地方。

大樹下不時會坐一大陣人，逐儕攏擎一支扇撥啊撥，在遐答嘴鼓，七個和尚八樣腔²，下屋个阿真叔講佢个後生愛做兵啊，擎心到會死，驚佢做兵毋知會得人欺負無？擎心到目汁硬討流落來啊。上屋个阿孀，講厥女後禮拜討嫁人，喊大家去得佢請，佢問大家嫁阿女有麼个風俗無？愛砣男方麼个？菜愛舂幾多斤？扇愛

¹ 𠵹𠵹：音 hen` hen`；繁茂狀。

² 七個和尚八樣腔：音 cid` gai` bbu` shong beed` rhong kiong`；形容人多口雜，主張不一致，各有各的說法。

得麼儕檢？渡路雞愛幾多隻？雖然有歸大墩个問題，毋過阿孀猶係真歡喜，暢到嘴笑鼻嘆；佢依嘛輸人毋輸陣，拗大家講佢女考著師專啊，加幾下年出業即會用做先生，鬥趁錢啊。大家你一句佢一句鬧熱滾滾，有人嘍嘛有人笑，實在真心色。

大樹下，這裡大人在遐答嘴鼓，遐裡个細子嘛真無閒，妹子在大樹下賞扮家貨，你做爺佢做哀，爛布子串起來做骰鍊，石頭疊起來做烘爐，樹葉做青菜，樹極做箸，大家賞到真歡喜；困子即在遐賞點膨嬰、弈紙牌；有一兜賞玻璃珠、灌土狗，這兜牛頭細子，逐個精斂斂³，脛著一墩鬆泥即知下腳有土狗，七手八腳培泥、攞水、漕水，毋使幾久土狗即走出來啊，這陣細子不時賞到愛大人擎竹修正肯轉屋下，實在真好笑。

大樹下有佢真多个回憶，係屋邊頭尾聯絡感情个所在，嘛係細子賞寮个地方。雖然童年離佢真遠啊，毋過童年个記憶猶係像在昨日共樣；遐頭根深葉靚个爛布子，像一支大大支个雨傘，保護佢人行過艱難又辛苦个日子，遐頭堅韌又耐命个大樹，到這下猶係佢生命內底精神个寄託。

³ 精斂斂：音 zin` kog` kog`；精明的樣子。

110 年全國語文競賽客家語朗讀文章國中學生組（南四縣腔）

編號 2 號

【學泅水】徐姿華原作

佢從細就蓋驚水，小學一年生該下，先生鼓勵大家學泅水，講泅水係蓋好个運動，身邊个好同學做下學曉泅水也，逞強个佢毋肯輸人，歸去屋下緊嚟¹阿媽講愛去學泅水。趕暑假，阿媽同佢尋著一間溫水个游泳池，還問著名聲盡好个教練來教佢，過買一身靚靚个連身游泳衫分佢，鼓勵佢勇敢去學泅水。

第一擺去到游泳池，又驚又好。做好體操，教練帶佢同另外四個學生仔練習沒泊汨²、學換氣；教練同佢等一個一個拗入游泳池，佢等乖乖聽教練指示，同頭那伸入水裡肚，佢嚇啊潑命扳等游泳池畔³、腳勾勾毋敢沾著水、抽骸潑命、嗽啊目流鼻涕，像分人苦毒啊盡慘个樣式；脣口个人做下緊看佢緊噓，教練緊拐佢，佢還係嗽到失聲、毋肯下水，高不將就請阿媽同佢帶歸去。

該暗晡，阿爸好聲好氣鼓勵佢繼續去學泅水；阿媽就唉唉唧唧道嘆：係毋去上課就會白白了核學費，無好退；阿哥也分享佢自家學泅水个經驗，還拿出佢盡毋盼得个極樂仔講愛做佢學曉泅

水个獎品。在大家个鼓勵之下，佢答應第二日愛過去上游泳課。

第二日朝晨，阿媽愛載佢去上游泳課，催啊催佢還係越越越越⁴、拖拖擲擲毋肯停動。上課時間硬硬會赴毋掣也，阿媽發譴拿出雞毛掃仔⁵愛修理佢，佢試著蓋委屈，又驚阿媽打又驚愛下水泅水，就嗽阿媽知聲說⁶，歸條巷仔都聽啊清清楚楚。鄰舍過來關心，知著佢係驚泅水正嗽啊大嫲聲，做下忍等無噓，加過鼓勵佢。就恁仔，該站時間，朝晨頭巷頭巷尾係有聽著佢又嗽啊哇哇滾，就知該日佢又愛去上游泳課也。

經過三禮拜个練習，游泳課个同學一批一批學曉走也，同學換啊換，佢還係手同腳落鉸毋著⁷，手記得划水也腳又毋記得踢水，實在毋得結煞。有一日，佢自家練習，毋多知手同腳配合得著也，泅有五公尺恁遠，心肝肚實在還歡喜哦！佢繼續練習，緊來緊熟手，手腳也緊來緊省力，圓身也緊來緊輕鬆，第一擺感受著泅水个生趣。

感謝該當時，屋下人个支持，同時鼓勵驚水个佢面對自家个困難去學泅水，分佢有機會去克服自家軟弱个所在。這下个佢，毋單淨曉得泅水，也做得硬程迎接人生个各種挑戰。

¹ 嚟：音 kieuˇ；要求。

² 沒泊汨：音 mud qi mi；潛水。

³ 游泳池畔：音 iuˇ iun` ciiˇ pan；游泳池邊緣。

⁴ 越越越越：音 soˇ soˇ so so；拖拖拉拉，故意拖延。

⁵ 雞毛掃仔：音 gie´ mo´ so e`；雞毛撻子。

⁶ 毋知聲說：音 mˇ di´ sang´ sod`；指痛哭失聲。

⁷ 落鉸毋著：音 lab` gau mˇ do`；配合不上。

【滿天星】李得福原作

來到屏東外阿公个菁園肚，一行一行高天天个檳榔樹，聽講兩、三十年前，一分地一年做得收成十過萬銀，還愛牽電火掌菁仔，園仔肚係有火光，賊仔就毋敢來偷割。今嘎價數蓋俗¹，正賣過去十分之一個錢，雖然賣毋成錢，外阿公還係打理到青柳柳仔，因為菁行之間有種加時計果，做得賣加一息錢。檳榔樹準柱樞，利用打核个電線搭棚仔，有紅電線、烏電索、雙股个白片線，邊脣用白片線牽透龍，紅烏電線橫架直架刺做三長過²个彩色時計果棚。

每年个三月春分前後，時計果開花吔，青花托撐起吊菜色个花蕾頭，還有牽白鬚个花瓣副花帽；第二層係五皮青黃色个公仔花，帶蓋貴个花粉；最頂層係三支像開螺絲个活動扳手³，又像豬仔个飯匙骨，這係嫵个花。佢識看外阿公拿一支毛筆，在每一蕊花頂高蘸蘸搵搵蓋像畫圖樣，佢問：「阿公你在該做麼个？」佢指等花蕾仔同佢講：「佢同花公个花粉蘸來膏在花嫵个花蕾頂，

¹ 價數蓋俗：音 ga sii goi xiog；價錢很便宜。

² 三長過：音 sam' cong' go；三長列。

³ 扳手：音 ban' su' / ban' su'；鎖緊、鬆弛螺絲與螺帽的工具。

恁呢正會打子結果啊！」

棚頂頂吊滿一粒粒青青个細果子，企在棚底下看起來就像滿天星斗，阿公講佢種个時計果品種就安到「滿天星」。蓋像佢伸手就摸得著七摘得著，又七食得著个星仔呢！

清明過後無幾久，時計果就轉烏黝紅，看啊去暗紅暗紅無青影就做得摘吔。佢等姊妹在棚底下，臥頭一粒看過一粒慢慢仔相，相著係紅到轉烏色就熟吔，甜度罅擺過無恁酸。摘著半菜籃仔共快扛去倒入紙箱肚，一轉、兩轉、三轉，紙箱仔裝到滿滿，愛載歸高雄冰起來定定仔食。熱天放學歸來，阿姆會同時計果洗淨，在蒂頭頂个外皮頂挖一個像五十個銀恁大个空，放在水果盤頂，佢等拿細調羹仔定定仔舀來食。正摘啊著个時計果特別甜，佢一下氣⁴就食核七粒，酸藕酸藕緊食緊爽口，連鼻公故出个氣頭又七酸藕酸藕，帶有時計果个味緒。

阿姆有時會同時計果裡肚个仁同汁挖出來，加一息白湯茶放入果汁機打，再用盞仔裝好放冰箱冰，分佢等準果汁啣。每擺係啣這果汁，就會想著在果棚下歸頭那毛雪白、嗆啊牙絲絲个外阿公。

⁴ 一下氣：音 id' ha hi；一口氣、一下子。

110 年全國語文競賽客家語朗讀文章國中學生組（南四縣腔）

編號 5 號

【畜羊仔个叔公】羅瑞霞原作

吾公有兩兄弟，佢等歇莊仔項，叔公歇在離莊頭無幾遠个石礮脣，叔公無討姐仔，一個人歇在礮脣，畜咗十過隻个羊仔。叔公講：一個人過日仔過自由，又毋使愁勞博激，每日快快樂樂過日仔，幾好呢！

佢從細就好遊遊野野，講著搞就一條線，毋過平常時，愛上課、讀書，一日到暗就國語、數學、英文、社會、電腦，搵到佢春頭磕額，頭暈腦疫，毋過到放寮日，該就係佢个天下也！

佢最好去尋叔公寮，叔公屋下面前係石礮，石礮脣有一大片草，打早羊仔在礮脣食草，佢見去到該跡仔，看著羊仔在該食草，就別事去操該羊仔，總愛同羊仔操到咩——咩——緊叫，佢就試著蓋生趣，該下仔，叔公在屋肚聽著羊仔叫，定著會走出來看，看著佢在該操羊仔，就罵講：孤盲牯，又在該操羊仔也！毋驚下二擺降个細人仔無屎肫。

佢看著叔公出來，黏時喊一聲「叔公，早啊！」叔公雖然會罵佢，毋過乜盡惜佢，因為屋下單淨佢一個孫仔。叔公笑咪咪仔行過來，緊行緊講：「羊仔肚飢在該食草，你莫撩佢，入來屋肚

佢拿糖仔分你食。」講著有糖仔好食，這又係佢好來叔公屋下个原因，叔公無家寶，一個人歇，故所不時有好食个東西就會留起來，等寮日拿分佢食。

叔公雖然一個人歇，毋過屋下整理啊淨淨俐俐，桌項無半息塵灰，完全看毋出叔公係單身哥仔。佢識問過阿公，仰仔叔公無討姐仔？阿公講：「頭擺叔公有熟事一個歇在莊尾个細阿妹仔，該細妹仔生著膨皮膨皮盡鬧，蓋煞猛，兩個人感情蓋好，兩家人也認定愛做親家且姆也；無恁著有一日，該細妹仔在田坵項做事，毋堵好分蛇哥咬著，該下仔醫藥毋發達，佢等草地堵著這兜事情，大部份都係自家拿草藥仔捶捶貼貼啊，就好也！哪知該細妹仔係分龜殼花咬著，無黏時送到街路分西醫看，就恁仔過身也。這細妹仔無核，對叔公个打擊蓋大。過後，叔公完全無愛同其它个細妹仔來去，蓋多人愛同叔公做媒人，都分叔公拒絕，叔公一個人就徙到礮脣歇也。」

阿公講：「係有閒，你愛不時去陪叔公哦！」好啊！叔公惜佢，同佢做陣無問題啦！

【大樹下】謝玉賢原作

記得做細人仔个時節，偌屋面前有條細河壩，河壩肚輒常看著有幾隻鴨仔，在該泗上泗下，有時偌等細人仔也會跳落水裡背，同鴨仔共下搞水，你庠偌，偌庠你，搞到歸身溼漉漉仔正歸。毋過，分偌印象最深个毋係該條細河壩，係河壩脣个該頭大樹。

該頭大樹，佢个名仔安到爛布樹，樹仔在中¹係空心个，毋過佢盡耐命，每年正開始熱，樹葉仔會跌到滿地泥，四叔就跋到樹頂，同樹桄剝到淨淨，毋使幾久，爛布樹又會綻筍，樹桄一支支，樹葉生到滿滿，大樹底下就係大家唱歌寮涼个好所在，也係細人仔搞寮个好地方。

大樹下不時坐一大群人，每一個人就拿等一支扇仔撥啊撥，在該打嘴鼓，七個和尚八樣腔，下屋个阿真叔講佢个俀仔愛做兵也，愁到無結煞，愁佢做兵毋知會分人欺負無？愁到目汁險險仔跌下來；上屋个姆姆，就講厥妹仔下禮拜愛嫁人，喊大家分佢請，佢問大家嫁妹仔有麼个風俗無？愛砣男方麼个？粢粢愛打幾

多斤？扇仔愛分麼人拈？帶路雞愛幾多隻？雖然有一大堆个问题，毋過姆姆還係盡歡喜，暢到牙絲絲仔；吾姆也輸人毋輸陣，同大家講：「偌妹仔考著師專也，加幾年添卒業就做得做先生，搵手賺錢也。」大家你一句偌一句鬧熱煎煎，有人噉也有人笑，實在還生趣。

大樹下，這片大人在該打嘴鼓，該片个細人仔也無閒著，細妹仔在大樹下搞家啦飯仔，你做爺仔偌做哀，爛布仔串起來做敲鍊，石頭結起來做炕爐，樹葉仔做青菜，樹桄做篾仔，大家搞到盡歡喜；細俀仔就在該搞屏人尋、打紙牌；有兜搞他瑪²、灌土狗仔，這兜山狗太，每個精善善仔，看著一團鬆泥就知下背有土狗仔，七手八腳挖泥、攞水、倒水，毋使幾久土狗仔就走出來也，這群細人仔不時搞到愛大人擎等竹修仔正肯歸屋下，實在還好噍。

大樹下有偌盡多个回憶，係隔壁鄰舍聯絡感情个所在，也係細人仔搞寮个地方。雖然童年離偌盡遠也，毋過童年个記憶還係像在昨晡日樣仔；該頭根深葉闊个爛布樹，就像一支大大支个遮仔，保護偌等行過艱難又辛苦个日子，該頭堅韌又耐命个大樹，到這下還係偌生命中精神个寄託。

¹ 對中：音 di dungˊ；中央。

² 他瑪：音 ta maˋ；玻璃珠